



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

**52. Kalenderwoche – ab 21. Dezember 2008**

## Fassadngledorror

Nee, isch bin ja ooch viele Jahre lang selbor Weihnachtsmann gewähsn, fiehr meine Kinnor, abor isch bin in all die Jahre nie off die Idee gekomm, außen am Haus an dor Fassade noffzugleddorn. Das is eene vellisch neie Mode, dass de Weihnachtsmännor an dor Fassade noffmachn dun. An eim Schdrigg odor mid eenor Schdriggleidor odor mid eenor rischdischn Leidor. Iborall siehd mor jedzde solsche vorweeschenen Weihnachtsdmännor an irschendwelsche Fassaden rumgraxsln. Un das is ja ooch gefährlich! Wenn isch dähn Weihnachtsmann gemachd hab, da hadde isch immor vorhähr e baar Schnäbsln zur Brusd genomm. Odor een Grogg. Odor zweeje. Ohne Bromille bisde ja gahr kee rischdischor Weihnachtsmann!

Wahrscheinlich dud die Mode aus Bayern komm. Bei dähnen is ja ooch das Fensdorln iblisch. Wobei beim Fensdorln nisch dor Weihnachtsmann mid de Geschenke im Sagg odor mid dor Rude komm dud. Nee, beim Fensdorln gehds um was annersch. Da soll ja dähr Bursche, dähr da in e Fensdor reinschdeischn dud, dähr soll ja... guhd, es had ooch was mid dor Rude un so zu dun, abor de Beschärung dud mor dann erschd e baar Monadde schbädor sehn. Un nach nein Monadde kommds dann rischdisch ans Daacheslischd.

Das is in Bayern eene alde Sidde, weil sisch de Bauorn in die einsamen Berge ohm nisch leisdn konndn, een Schwieschorsohn zu grischn, dähr mid dor Rude nischd anfang konnde. Bevors de bayrischn Bauorn ihre Deschdor weggegähm hamm, mussde dähr Bursche seine Dallende nachweisn. Un ooch de Deschdor. Das war rum wie num. Erschd mussde jednfalls de Nachwuchsfrage ge glärd sein. Un weils abor offizjell nisch vor dor Ehe abgebriefd wern konnde, da mussdn ehm de Burschn heimlich fensdorln gehn.

Abor warum nu ooch dor Weihnachtsmann? Warum muss dähr nu ooch außn an dor Fassade noff?

Dähr muss das doch nisch heimlich machn. Das was mor als Weihnachtsmann beschärn dud, das is doch nisch geschn de siddlischn Vorschrift! Odor doch?

Naja, in Bayorn dud ja eischendlich das Chrisdkind komm - mid de Geschenke un so. Dor Weihnachtsmann is ja dord gahr nisch vorgesehn... womeeschlich is dor Weihnachtsmann eene unerwünschde Gongurrenz in Bayorn? Eene neie Mode, die aus de nein Bundsländor nach Bayorn iborgeschwabbd is. Von uns Osis! Ja, das kennde sein. Un weil ja, was ausm Osdn is, nisch doochn kann, deshalb muss dor Weihnachtsmann in Bayorn heimlich außn an dor Fassade noffmachn mid Sagg un Rude.

Guhd, abor warum dann ooch bei uns? Bei uns is dor Weihnachtsmann kee unerwünschdor Gasd. Bei uns kennde dähr doch - so wie isch das ooch immor gemachd habb - einfach an de Diere bochn un Einlass begährn. Nee, isch gloobe, mir Osis sinn doch e bißl bleede - da dun mir erschd dähn Weihnachtsmann egsbordiern un dann dun mir ne als Fassadngledorror widdor imbordiern!

**Eduard Sachsenmeyer**